



COVID-19
VACCINE

Vacsainí in aghaidh COVID-19

Faisnéis faoi do
vacsaín Comirnaty (**Pfizer**)

Leagan 4

Meán Fómhair 2025

Maidir leis an leabhrán seo

Tá eolas sa leabhrán seo maidir le do vacsaín in aghaidh COVID-19.

- Cé dó a mholtar vacsaín COVID-19 a fháil?
- Cad a tharlóidh mura bhfuair mé vacsaín COVID-19 riamh?
- Vacsaíní molta
- Toircheas agus beathú cíche
- COVID-19 agus leanaí
 - » Cead leis an vacsaín a thabhairt do do pháiste
- Céard ba cheart duit a bheith ag súil leis tar éis do vacsaín in aghaidh COVID-19 a fháil
- Fo-iarmhairtí an vacsaínithe agus cathain gan vacsaín a fháil
 - » Fo-iarmhairtí
 - » Cathain gan vacsaín a fháil
 - » Céard ba cheart a dhéanamh má bhíonn fiabhras nó tinneas agus pianta ort
- An fad a thógann sé ar vacsaíní tosú ag obair
- Cén chaoi ar féidir fo-iarmhairtí a thuairisciú
- Do chuid faisnéise pearsanta

Is féidir leis an vacsaíneoir freagra a thabhairt ar aon cheist a bheidh agat tar éis duit an leabhrán seo a léamh.

Maidir le do vacsaín in aghaidh COVID-19

Is é vacsaín in aghaidh COVID-19 a fháil an chaoi is fearr chun tú féin a chosaint ar COVID-19. Leis na vacsaíní a chuireann FSS ar fáil, soláthraítear an chosaint is fearr atá ann in aghaidh aimhréidh thromchúiseach COVID-19, agus laghdaítear an baol maidir le seal a chaitheamh san ospidéal nó bás a fháil.

Molann an Coiste Comhairleach Náisiúnta um Imdhíonadh (NIAC) gur cheart vacsaíní mRNA a thabhairt. Tá faisnéis sa leabhrán seo faoin vacsaín nuashonraithe Comirnaty (Pfizer) arb í an vacsaín mRNA molta atá ar fáil a úsáidtear i gclár vacsaínithe COVID-19 na hÉireann.

Cé dó a mholtar vacsaín COVID-19 a fháil?

Moltar do dhaoine atá i mbaol breoiteachta tromchúisí ó COVID-19 vacsaín a fháil. I gcás fhormhór na ndaoine atá i mbaol breoiteachta tromchúisí, moltar vacsaín COVID-19 uair sa bhliain. Má tá tú i ngrúpa an-ardriosca, lagaíonn an chosaint ar vacsaíniú níos tapúla agus dá bhrí sin chun níos mó cosanta a fháil, moltar vacsaín COVID-19 dhá uair sa bhliain.

Ba cheart duit vacsaín COVID-19 a fháil uair sa bhliain má tá tú:

- Idir 60 agus 79 bliain d'aois
- 6 mhí d'aois nó níos sine agus riocht sláinte agat a chuireann tú i mbaol níos mó aimhréidh ó COVID-19 a fháil

Ba cheart duit vacsaín COVID-19 dhá uair sa bhliain má tá tú:

- 80 bliain d'aois agus níos sine
- 18 mbliana d'aois agus níos sine agus i do chónaí in áis cúraim fhadtéarmaigh do dhaoine scothaosta
- 6 mhí d'aois agus níos sine agus imdhíon-lagú (córas imdhíonachta lag) agat a chuireann tú i mbaol níos airde aimhréidh ó COVID-19 a fháil

Más oibrí cúraim sláinte thú agus má tá tú in aon cheann de na grúpaí atá liostaithe thuas, ba cheart duit an chomhairle chéanna a leanúint.

Má tá tú ag iompar clainne agus má tá córas imdhíonachta lag agat nó má tá riocht leighis ort a chuireann tú i mbaol níos airde aimhréidh ó COVID-19 a fháil, ansin ba cheart duit dáileog amháin de vacsaín COVID-19 a fháil le linn do thoirchis.

Más oibrí cúraim sláinte thú nó má tá tú ag iompar clainne nó má tá tú os cionn 18 mbliana d'aois agus mura bhfuil tú in aon cheann de na grúpaí atá liostaithe thuas, is féidir leat vacsaín COVID-19 a fháil uair sa bhliain más mian leat, tar éis plé le do sholáthraí cúraim sláinte.

Má fuair tú an vacsaín roimhe seo, ba cheart duit fanacht 3 mhí ar a laghad tar éis do vacsaín COVID-19 dheireanach nó d'ionfhabhtú COVID-19 deireanach sula bhfaighidh tú an vacsaín.

Le tuilleadh eolais a fháil maidir le cén uair atá do chéad vacsaín COVID-19 eile le bheith ann, tabhair cuairt ar **www.hse.ie** nó glaoigh ar ár bhfoireann ag HSE Live ar **1800 700 700** nó labhair le do sholáthraí cúraim sláinte.

Cad a tharlóidh mura bhfuair mé vacsaín COVID-19 riamh?

Mura bhfuair tú vacsaín COVID-19 riamh agus má tá tú i ngrúpa riosca (mar atá liostaithe thuas), ansin moltar duit vacsaín COVID-19 a fháil. Mura bhfuair tú vacsaín COVID-19 riamh agus mura bhfuil tú i ngrúpa riosca, is féidir leat vacsaín a fháil má roghnaíonn tú ceann a fháil, tar éis plé le soláthraí cúraim sláinte. D'fhéadfadh go mbeadh níos mó ná dáileog vacsaíne amháin ag teastáil ó aon duine ag a bhfuil imdhíon-lagú (córas imdhíonachta lag) nó ó leanaí idir 6 mhí agus 4 bliana d'aois nach raibh vacsaín COVID-19 acu riamh roimhe seo. Ba cheart duit labhairt le do sholáthraí cúraim sláinte le haghaidh tuilleadh comhairle faoin líon vacsaíní atá de dhíth agus an t-am is fearr chun vacsaín a fháil. Mura bhfuair tú vacsaín COVID-19 riamh agus má fhaigheann tú ionfhabhtú COVID-19, ba cheart duit fanacht 4 seachtaine ar a laghad tar éis d'ionfhabhtaithe sula bhfaighidh tú vacsaín.

Vacsaíní molta

Tairgfear duit an vacsaín mRNA Comirnaty nuashonraithe is déanaí, déanta ag Pfizer.

Leis na vacsaíní Comirnaty nuashonraithe is déanaí, soláthraítear an chosaint is fearr atá ar fáil ar na cineálacha de COVID-19 atá ag scaipeadh.

Molann an Coiste Comhairleach Náisiúnta um Imdhíonadh (NIAC) vacsaíní mRNA Comirnaty nuashonraithe, agus tá siad formheasta ag an nGníomhaireacht Leigheasra Eorpach (EMA).

Tábhachtach:

D'fhéadfadh sé tarlú nárbh ionann an chomhairle ón nGníomhaireacht Leigheasra Eorpach (EMA) agus ón gCoiste Comhairleach Náisiúnta um Imdhíonadh (NIAC) in amanna. Sa chás sin, cloímid in Éirinn le treoir NIAC.

Toircheas agus beathú cíche

Má tá tú ag iompar clainne agus má tá tú i ngrúpa riosca, mar shampla má tá córas imdhíonachta lag agat nó má tá riocht leighis ort a chuireann tú i mbaol níos airde aimhréidh ó COVID-19 a fháil, ba cheart duit ansin dáileog amháin de vacsaín COVID-19 a fháil le linn do thoirchis. D'fhéadfaí a mholadh do roinnt daoine a bhfuil córas imdhíonachta lag acu an dara vacsaín COVID-19 a fháil le linn a dtoirchis.

Mura bhfuil tú i ngrúpa riosca, is féidir leat rogha a dhéanamh vacsaín COVID-19 a fháil más mian leat, tar éis plé le do sholáthraí cúraim sláinte.

Má tá tú ag iompar clainne, ba cheart duit fanacht 6 mhí ó fuair tú an vacsaín nó an t-ionfhabhtú COVID-19 roimhe seo sula bhfaighidh tú an vacsaín. Is féidir leat an vacsaín COVID-19 a fháil ag aon chéim den toircheas, ach is é an t-am is fearr ná idir 20 agus 34 seachtain den toircheas. Tá an vacsaíniú COVID-19 sábháilte le linn toirchis.

Tá sé sábháilte an vacsaín COVID-19 a fháil má tá tú i mbun cothaithe cíche.

COVID-19 agus leanaí

Bíonn siomptóim an-éadrom ag formhór mór na leanaí a fhaigheann COVID-19.

Is féidir le breoiteacht thromchúiseach a bheith ar pháiste de thoradh COVID-19, é/í a chur san ospidéal nó a bheith ina cúis le bás, ach is le cásanna an-annamh a bhíonn siad sin ann.

Tá leanaí atá 6 mhí d'aois agus níos sine a bhfuil riochtaí leighis áirithe orthu agus leanaí a bhfuil córais imdhíonachta laga acu i mbaoil níos airde tinneas tromchúiseach a bheith acu agus dul isteach san ospidéal má fhaigheann siad COVID-19, agus moltar dóibh vacsaín COVID-19 a fháil uair nó dhó sa bhliain.

Is annamh a bhíonn COVID-19 ina chúis le riocht ar a dtugtar Siondróm Athlastach Ilchóras i Leanaí (MIS-C). Is féidir leis an riocht sin a bheith ina chúis le hathlasadh orgán éagsúil (e.g., an croí). Ní bhíonn aon riocht sláinte bunúsach ag formhór na leanaí a fhaigheann MIS-C. An chuid is mó de na leanaí a dtagann MIS-C orthu, tagann siad chucu féin arís tar éis seal a chaitheamh san ospidéal nó faoi dhianchúram, ach d'fhéadfadh sé go bhfaigheadh líon an-bheag leanaí bás.

Uaireanta, fanann siomptóim a bhaineann le COVID-19 ar an duine ar feadh roinnt seachtainí nó míonna. Tugtar 'COVID fada' air sin. Is lú riosca an reachta sin do leanaí ná do dhaoine fásta.

Cead leis an vacsaín a thabhairt do do pháiste

Iarrfar ar thuismitheoir nó ar chaomhnóir dlíthiúil cead a thabhairt chun a leanbh a vacsaíniú.

Déanfar de réir do chinnidh le cead a thabhairt nó gan cead a thabhairt maidir leis an vacsaín.

Céard ba cheart duit a bheith ag súil leis tar éis do vacsaín in aghaidh COVID-19 a fháil

Amhail gach cógas, is féidir le vacsaíní a bheith ina gcúis le **fo-iarmhairtí**. Tá an chuid is mó díobh sin éadrom nó measartha agus gearrthéarmach, agus ní fhaigheann gach duine iad.

Ní fheictear fo-iarmhairtí tromchúiseacha, amhail frithghníomhú trom ailléirgeach, ach go fíor-annamh. Tá oiliúint curtha ar an vacsaíneoir le cóir leighis a chur ar othair atá bualte ag frithghníomhuithe troma ailléirgeacha den sórt sin.

Bíonn fo-iarmhairtí éagsúla i gceist le gach vacsaín, agus ba cheart duit an leabhrán seo agus bileog faisnéise an mhonaróra d'othair maidir le do vacsaín a léamh. Tá bileog faisnéise an mhonaróra le fáil ar **www.hse.ie**, nó is féidir linn cóip i gcló a chur ar fáil duit ar lá do vacsaínithe.

Sa chéad chuid eile, tugaimid léiriú ar na fo-iarmhairtí atá ar eolas maidir leis an vacsaín in aghaidh COVID-19 a bhfuil cur síos uirthi sa leabhrán seo, agus insimid duit cé chomh coitianta nó annamh is atá siad. Tarraingimid aird freisin ar na daoine nár cheart an vacsaín a fháil. Is féidir leat tuilleadh eolais a fháil ar **www.hse.ie**.

Fo-iarmhairtí an vacsaínithe agus cathain gan vacsaín a fháil

Ar na leathanaigh seo a leanas, tugaimid eolas duit ar na fo-iarmhairtí féideartha agus cathain nár cheart an vacsaín a fháil. Déanaimid na fo-iarmhairtí a aicmiú ó an-choitianta go fíor-annamh.

- An-choitianta – níos mó ná duine amháin as gach deichniúr
- Coitianta – suas le duine amháin as gach deichniúr
- Neamhchoitianta – suas le duine amháin as gach 100 duine
- Annamh – suas le duine amháin as gach 1,000 duine
- An-annamh – suas le duine amháin as gach 10,000 duine
- Fíor-annamh – ní fios go fóill cá mhéad duine a mbeidh na fo-iarmhairtí seo acu tar éis an vacsaín a fháil, ach ceaptar iad a bheith fíor-annamh

Tá ainm na vacsaíne le fáil ar an gcárta taifid a thabharfaidh an vacsaíneoir duit agus ar na leathanaigh sa leabhrán seo. Ba cheart duit a bheith ag faire amach le haghaidh fo-iarmhairtí sna huaireanta agus sna laethanta tar éis an vacsaín a fháil.

Fo-iarmhairtí

Fo-iarmhairtí na vacsaíne Comirnaty (Pfizer) COVID-19

Tá liosta thíos de na fo-iarmhairtí féideartha agus cé chomh minic a tharlaíonn siad, agus tá eolas freisin ar cathain nár cheart an vacsaín áirithe seo a fháil. larr comhairle ar ghairmí cúraim sláinte iontaofa má bhíonn aon amhras ort.

Fo-iarmhairtí féideartha	
An-choitianta Níos mó ná duine amháin as gach deichniúr	• tuirse • soghortaitheacht (i leanaí idir 6 mhí agus 23 mí) nó pian agus at san áit ina bhfuarthas an instealladh vacsaíne • tinneas cinn • pian matáin • pian ailt • buinneach • fiabhras – teocht 38 céim Celsius nó os a cionn – nó crithfhuacht • deirge san áit ar tugadh an vacsaín (i leanaí atá idir 6 mhí agus 11 bhliain d’aois) • cantal (i leanaí atá idir 6 mhí agus 23 mí d’aois) • goile laghdaithe (i leanaí atá idir 6 mhí agus 23 mí d’aois) • codlatacht (i leanaí atá idir 6 mhí agus 23 mí d’aois)
Coitianta Suas le duine amháin as gach deichniúr	• masmas • urlacan • deirge san áit ar tugadh an vacsaín • at na bhfaireog limfe • gríos (i leanaí atá idir 6 mhí agus 23 mí d’aois)

Neamhchoitianta Suas le duine amháin as gach 100 duine	• tochas san áit ar tugadh an vacsaín • meadhrán • tochas ginearálaithe • frithghníomhuithe ailléirgeacha, amhail aodh thochais nó gríos nó at san aghaidh • deacracht dul a chodladh • allas iomarcach • allas oíche • goile laghdaithe • easpa fuinnimh, marbhántacht nó mothú tinn • pian sa ghéag láimhe ar a tugadh an vacsaín duit
Annamh Suas le duine amháin as gach 1,000 duine	• cromadh sealadach ar thaobh amháin den aghaidh
An-annamh Suas le duine amháin as gach 10,000 duine	• an miócairdíteas agus an peireacairdíteas. Is éard atá i gceist leo sin ná athlasadh an chroí nó athlasadh líneáil sheachtrach an chroí. Féach ar an gcéad leathanach eile le haghaidh na siomptóm.
Fíor-annamh Ní fios go fóill cé chomh minic a fheictear iad	• frithghníomhú trom ailléirgeach • eiritéime ilfhoirmeach – is frithghníomhú craicinn a bhíonn ina chúis le spotaí nó baill dhearga ar an gcraiceann a mbíonn cuma ‘shúil na sprice’ ar na baill sin in amanna, iad dúdhearg sa lár agus fáinní dearga níos éadroime timpeall orthu • at aghaidhe má tá líontóirí aghaidhe agat • at fairsing sa ghéag láimhe – nó coise inar tugadh an vacsaín • griofadach nó drithlíní, nó cailliúint mothaithe i gcuid den chorp • míostrú trom

Is riochtaí athlastacha croí iad an míócairdíteas agus an peireacairdíteas. Tá baol na riochtaí annamh seo níos airde i measc fir óga.

Is dóichí go dtarlóidh na riochtaí sin i ndiaidh an dara dáileog den vacsaín. Den chuid is mó, bíonn siad le feiceáil faoi cheann 14 lá tar éis an vacsaín a fháil.

Rinneadh baol an mhiócairdítis tar éis an dara dáileog den vacsaín a mheas in dhá staidéar Eorpacha:

- Aon chás breise amháin do gach 38,000 fear idir 12 agus 29 bliain d'aois (faoi cheann 7 lá)
- Aon chás breise amháin do gach 17,500 fear idir 16 agus 24 bliain d'aois (faoi cheann 28 lá)

Tagann an chuid is mó de na daoine a bhfuil míócairdíteas nó peireacairdíteas orthu chucu féin as a stuaim féin nó le cóireáil thacúil, ach bheadh cúram san ospidéal ag teastáil uathu. D'fhéadfadh sé a bheith san áireamh go mbeadh gá dul go dtí an t-aonad dianchúraim. Ní fios go fóill an mbeidh aon fhadhbanna fadtéarmacha i gceist leis na fo-iarmhairtí sin.

Siomptóim an mhiócairdítis agus an pheireacairdítis

Faigh cúram leighis má thagann aon cheann de na siomptóim seo ort tar éis duit an vacsaín seo a fháil:

- giorra anála
- éirí croí – buille láidir croí a d'fhéadfadh a bheith neamhrialta
- pian chliabhraigh

Cathain gan vacsaín a fháil

Níor cheart duit an vacsaín Pfizer (Comirnaty) in aghaidh COVID-19 a fháil sna cásanna seo a leanas:

- Bhí frithghníomhú trom ailléirgeach agat roimhe seo i leith aon cheann de chomhábhair na vacsaíne, gliocól poileitiléine nó PEG ina measc. Léigh bileog eolais othar an mhonaróra le liosta na gcomhábhar a fheiceáil.
- Bhí frithghníomhú trom ailléirgeach agat tar éis dáileog eile de vacsaín mRNA COVID-19, e.g., vacsaíní Comirnaty (Pfizer) nó Spikevax (Moderna).
- Bhí frithghníomhú trom ailléirgeach agat i leith Trometamol – ceann de na hábhair atá i ruaim chodarsnach a úsáidtear i staidéir raideolaíocha ÍAM.
- Chuir Dochtúir in iúl duit nár cheart vacsaín mRNA COVID-19 a fháil, e.g., vacsaíní Comirnaty (Pfizer) nó Spikevax (Moderna), ar chúiseanna leighis.

Labhair le do dhochtúir sula bhfaighidh tú an vacsaín seo in aghaidh COVID-19 más fíor d'aon cheann de na ráitis seo a leanas:

- Bhí frithghníomhú trom ailléirgeach – anaifiolacsas – agat roimhe seo, lena n-áirítear frithghníomhú tromchúiseach ailléirgeach i leith vacsaín ná cógas eile.
- Tháinig miócairdíteas nó peireacairdíteas– athlasadh mhatán an chroí nó líneáil an chroí – ort tar éis dáileog de vacsaín in aghaidh COVID-19 roimhe seo.
- Tá riocht ort darb ainm mastaiciotóis.
- Tá tú ag mothú an-tinn faoi láthair.

Leanaí a raibh an Siondróm Athlastach Ilchóras – MIS-C– orthu roimhe seo, is féidir leo an vacsaín in aghaidh COVID-19 a fháil nuair a bheidh siad tagtha ar ais chucu féin agus 90 lá ar a laghad tar éis dóibh an diagnóis a fháil, cibé acu is faide.

Má fuair tú an vacsaín mpox – Imvanex nó JYNNEOS – le déanaí, ní mór duit fanacht 4 seachtaine sula bhfaighidh tú an vacsaín in aghaidh COVID-19 mar gheall ar an mbaol féideartha miócairdítis.

Céard ba cheart a dhéanamh má bhíonn fiabhras nó tinneas agus pianta ort

Má bhíonn fiabhras (teocht de 38 céim Celsius nó níos airde) nó tinneas agus pianta ort, is féidir leat paraicéiteamól nó iobúpróifein a thógáil lena maolú. Mar sin féin, má mhaireann an fiabhras níos mó ná 48 uair an chloig nó má tá imní ort fós, lorg comhairle leighis, le do thoil.

Má tá tú ag iompar clainne agus má bhíonn fiabhras nó tinneas agus pianta ort i ndiaidh an vacsaín a fháil, is féidir leat paraicéiteamól a thógáil. Ná glac iobúpróifein nó aspairín chun cóireáil a chur ar fhiabhras nó tinneas agus pianta i ndiaidh vacsaín a fháil agus tú ag iompar clainne.

An fad a thógann sé ar vacsaíní tosú ag obair

Tógann sé roinnt ama, suas le 14 lá tar éis an vacsaín a fháil, ar do chóras imdhíonachta freagairt don vacsaín agus tú a chosaint ó thromaimhréidh COVID-19.

Tá fianaise láidir iontaofa ann go bhfuil na vacsaíní in aghaidh COVID-19 an-éifeachtach maidir le bás agus galar tromchúiseach mar thoradh ar COVID-19 a chosc.

Ba cheart duit cloí freisin leis an gcomhairle sláinte poiblí is déanaí ó thaobh tú féin agus daoine eile a chosaint atá ar fáil ar **www.hse.ie**.

Cén chaoi ar féidir fo-iarmhairtí a thuairisciú

Más dóigh leat go bhfuil fo-iarmhairt ort i ndiaidh duit vacsaín a fháil, is féidir é a thuairisciú don Údarás Rialála Táirgí Sláinte (ÚRTS) ag **www.hpra.ie**.

Is féidir le do dhochtúir, d'altra, nó do phoitigéir nó le ball clainne an fho-iarmhairt a thuairisciú don ÚRTS freisin.

Do chuid faisnéise pearsanta

Leis an vacsaín a thabhairt do dhaoine ar bhealach slán sábháilte agus leis an bhfaisnéis uile a thaifeadadh is gá le monatóireacht agus bainistíocht a dhéanamh ar an vacsaín, beidh FSS ag próiseáil do chuid faisnéise pearsanta. Déanfaidh FSS an fhaisnéis go léir a phróiseáil de réir na ndlíthe ginearálta agus de réir an Rialacháin Ghinearálta maidir le Cosaint Sonraí (GDPR), go háirithe, a tháinig i bhfeidhm in 2018.

Próiseálfar do shonraí go dleathach agus go cothrom. Ní dhéanfar iad a phróiseáil ach amháin chun críche vacsaínithe a bhainistiú. Cuireann an FSS prionsabal an íoslaghdaíthe sonraí i bhfeidhm. Ciallaíonn sé sin nach dtaifeadfar ach na sonraí a bheidh ag teastáil le thú a aithint, do choinne a chur in áirithe, do vacsaíniú a thaifeadadh agus monatóireacht a dhéanamh ar a éifeachtaí.

Mar dhuine is ábhar do na sonraí faoi GDPR maidir le do shonraí pearsanta a dhéantar a phróiseáil, tá sé de cheart agat:

- Faisnéis maidir le do shonraí pearsanta agus rochtain orthu a iarraidh, ar a dtugtar 'iarratas rochtana duine is ábhar do shonraí' de ghnáth. Cuirtear ar do chumas leis sin cóip de na sonraí pearsanta atá á gcoinneáil againn maidir leat a fháil agus a chinntiú go bhfuil siad á bpróiseáil de réir an dlí againn.
- A iarraidh go ndéanfaí na sonraí pearsanta atá againn maidir leat a cheartú. Cuirtear ar do chumas leis sin a iarraidh go ndéanfaí aon fhaisnéis neamhiomlán nó mhíchruinn atá againn maidir leat a cheartú.
- Léirsciosadh do chuid sonraí pearsanta a iarraidh. Cuirtear ar do chumas leis sin a iarraidh orainn sonraí pearsanta a scriosadh nó a bhaint i gcás nach mbeidh aon chúis mhaith againn le leanúint lena bpróiseáil. Tá sé de cheart agat chomh maith iarraidh orainn do chuid faisnéise pearsanta a scriosadh nó a bhaint i gcás gur fheidhmigh tú do cheart le cur i gcoinne a próiseála.
- Cur i gcoinne phróiseáil do chuid sonraí pearsanta.

Tá tuilleadh eolais le fáil ar **www.hse.ie/eng/gdpr**.



**COVID-19
VACCINE**

Is féidir leat naisc a fháil freisin
chuig na bileoga faisnéise
othar don vacsaín COVID-19
ar láithreán gréasáin FSS.
Scan an cód MF chun an
fhaisnéis a léamh.



Arna fhoilsiú ag FSS Meán Fómhair 2025
Leis an bhfaisnéis is déanaí a fháil, téigh go dtí **www.hse.ie**

Cód Ordaithe: HNI01602GA